

**CAUSES Y CONSECUENCIAS
DE LA EMIGRACIÓN
FORCIADA DE LA MOCEDÁ
N'ASTURIES**



Darréu

Mocedá d'izquierda Soberanista d'Asturies

Abril 2015

DOCUMENTU ANALÍTICU ALRODIU LES CAUSES Y CONSECUENCIES DE LA EMIGRACIÓN FORCIADA DE LA MOCEDÁ N'ASTURIES

La emigración forciada de la mocedá n'Asturies a la gueta d'un trabayu y d'un futuru dignu lleva siendo un pergrave problema dende va décadas. Una vez finada la formación académica, profesional o llaboral, y viendo que les ofertes de trabayu y futuru n'Asturies son perprobes y mui precaries, munches moxes y mozos tomen la decisión de facer les maletes y colar d'Asturies a la gueta d'oportunidaes y condiciones más dignes que les que se-yos ofrecen nel nuesu país.

Esta situación dexa al nuesu pueblu con un ablucante desaxuste poblacional, tresformándose nuna sociedá avieyada, y como ye bien sabío, los pueblos ensin mocedá son pueblos ensin futuru, polo que podemos dicir que tamos énte un grave problema qu'hai qu'iguar. Pero pa iguar los problemes, ye necesario saber cuáles son les causes y facer un análisis de la situación actual nel nuesu país, asina como ufrir soluciones ya idegues pa tresformar la situación y da-y la vuelta a la tortiella.

¿Qué entendemos por emigración forciada?

Esti ye un términu qu'hai que tener bien nidu, ya que pa muncha xente emigar pue consistir namás en colar pa Bruseles, Londres, los EEXX o Alemaña y, en cambiu el fechu de dir a trabayar a Madrid, Barcelona o Santander, puede nun ser considera'o como emigración, al tratase de desplazamientos dientro del mesmu Estáu.

En cambiu, dende Darréu entendemos que la emigración forciada va muncho más allá y ye un fenómenu muncho más estrictu y complexu, ya qu'emigrar consiste en tener que colar d'Asturies, -ensin escaecer tampoco los desplazamientos poblacionales forciaos a nivel de conceyos-, por mor de qu'ellí nun haya oportunidaes de desendolcase llaboralmente nos ámbitos nos qu'esos conceyos y territorios podríen ufrir poles sos carauterístiques ñaturales, industriales, teunolóxicos o sociales, y que nun lo faen frutu de la desvertebración sufría nel país. Ye por ello qu'entendemos qu'el fechu de que la mocedá tenga qu'emigrar de forma obligatoria y forciada de les fasteres orientales y occidentales d'Asturies, y de les zones más rurales haz a la zona central prósima a les ciudaes, ye un fechu negativu qu'hai qu'iguar y qu'hai qu'aparar, atopando igües al despoblamentu de

toes estes zones y xenerando condiciones de futuru pa la mocedá de los pueblos y conceyos que nun s'alcuentren na zona centru d'Asturies.

Sicasí, nenguna zona del país se llibra d'afechu d'esti llamtable fenómenu, polo que la emigración forciada refierse principalmente al fechu de colar d'Asturies a cualesquier otru lláu fuera de les nueses llendes y de los nuesos pueblos por mor de que nellos nun se xeneren les condiciones dignes pal desendolcu llaboral, personal, ya incluso como pueblu. L'actual configuración del capitalismu nel Estáu español -y n'Asturies como parte del mesmu- fuerza a la emigración en dos vertientes: como aliviu al descomanáu problema del desemplegu dientro d'Asturies, y como forma de redistribuyir la mano d'obra n'aquelles zones onde s'alcuentren anguaño los intereses más importantes de les élites capitalistes.

¿Cuales son les cifres actuales? ¿Cuántes moxes y mozos emigren al añu n'Asturies?

Son delles les cifres que pueden destacase nel actual panorama asturianu alrodiu la emigración forciada de la mocedá y otros datos económicos y sociales que provoquen esta problemática, de tal importancia qu'Asturies, según proyeiciones demográfiques, pasaría haza l'añu 2030 a tar perbaxo'l millón d'habitantes.

En primer términu, alcontrámonos con unes cifres d'emigración forciada (xeneral, pero qu'afeuten básicu y mayoritariamente a la mocedá) qu'en 2013 superaron les 14.600 persones, y que nos dexa una media asemeyada nos últimos años. Podemos falar polo tanto de decenes de miles de mozos y moxes emigraes cada añu nel nuesu país, representando Asturias el 5% de la emigración xuvenil nel Estáu, cuando la nuesa mocedá representa namás qu'el 2% del total.

Nel añu anterior foron unes 28.000 les persones que marcharon d'Asturies rumbu a otros países del Estáu español por motivos llaborales, con un saldu bien negativu al respetu que coincide cola cifra d'asturianos y asturianos emigraos durante los últimos años, na media d'unos 14.000 aprosimadamente.

Los conceyos más afeutaos pola emigración de mocedá son los de les cuenques mineres, tanto Caudal como Nalón. Estes fasteres carguen con un pesu tan significativu hasta'l puntu de representar, según dellos estudios, la metá de la emigración total n'Asturies dende l'añu 2007. Anque nes cifres absolutes destaquen los conceyos más poblaos -Xixón, Uviéu, Avilés, Siero-, les cifres rellatives amuesen una esmolecedora perda de cientos de persones en cada conceyu del occidente asturianu, situación que se repite nel oriente y en dellos conceyos pequeños del ámbitu central. Poro, agüeyase un claru despoblamiento de les zones rurales que pierden población tanto rumbu a los conceyos más urbanizaos, como fuera d'Asturies.

No rellativo a la emigración forciada dientro l'Estáu español, puede güeyase cómo'l mayor númberu de persones alcuéntense pente los 15 y los 34 años, siendo Madrid, Castiella y Llión, Galiza, o Catalunya, dalgunes de les principales "Comunidaes Autónomes" receptores d'emigración viniente d'Asturies.

Dende una perspeutiva de xéneru, amás de sufrir más el paru y la precariedá n'Asturies, les muyeres representen tamién cerca de la metá de la emigración forciada, siendo por exemplu en 2013 7.055 les muyeres emigraes, d'un total de 14.660 persones. Poro, como en tantes otres cuestiones, les muyeres una vegada más tan careciendo les consecuencias del patriarcáu y el so papel nel sistema capitalista.

Si nos averamos a les llistes del desemplegu, casi 9.000 persones formen el coleutivu de persones ensin trabayu anterior -básicamente mocedá-, dientro d'un paru xuvenil que n'Asturies supera'l 50%, y alcuéntrase nos puestos altos a nivel estatal. Y dientro tamién d'esi tarrén llaboral, vemos otres cifres, como la mengua del 17% dende l'añu 2008 nos salarios de les persones menores de 25 años, o una media superior al 90% nel númberu de contratos temporales firmaos sobre'l total.

Como consecuencia d'esta falta d'oportunidaes llaborales, atopamos datos qu'espeyen les pergrandes dificultaes que tien la mocedá pa poder emancipase, tando la media n'alrodiu los 30 años, dáu l'altu preciu de la vivienda en comparanza colos sueldos y les condiciones llaborales a les qu'accede la xuventú asturiano. Tamién pueden amestase les más de 200.000 persones en situación de probitú según informes europeos, les más de 100.000 persones con dificultaes d'accesu a calefacción, unes 200 muertes al añu n'Asturies por fríu, cientos de cortes del suministru de lluz por parte d'empreses como HC Energía -nun país escendentariu na producción llétrica, como ye Asturias-, y un llargu

etcétera de cifras oxetives qu'amuesen a les clares una murnia realidá económica y social na Asturias d'anguaño.

Y a los avezaos problemes nel aspeutu llaboral -que repercuten nel restu d'ámbitos de la situación económica del pueblu trabayador asturianu, y enforma na mocedá- hai qu'amestar les crecientes dificultaes pa formase, coles tases de les matrícules n'espoixigue, les beques recortándose, les condiciones nes aules cada vegada piores y con menos accesu a recursos pa desendolcar l'actividá nelles, etc.

¿Cuáles son les causes? ¿Quiénes son los responsables de que la mocedá se vea obligada a colar d' Asturias?

Dende va unes décadas, n' Asturias entamó a falase de la "Reconversión industrial", un procesu vendíu dende les élites económicas y polítiques de la Xuniún Europea, l'Estáu español ya instituciones sucursalistes asturianas -sobre manera remanaes pola UXT ya'l PSOE-, anque nesti procesu nun podemos escaecer a nenguna de les entidaes polítiques y sindicales que n'aquella dómina teníen representación y pesu políticu institucional-. Esa Reconversión Industrial, según el discursu oficial, consistiría en tresformar y modernizar el modelu industrial productivu d' Asturias, dende la minería, el naval o la siderurxia ente munches otres industries, anque nada más lloñe de la realidá: lo que se vendía como "reconversión" convirtióse na práutica en desindustrialización, desmantelamientu industrial, de los seutores que tradicionalmente cuntaben con importancia n' Asturias.

La minería pasó de ser el motor económicu del país a caltener malapenes un millar de trabayadores direutos; el naval desapareció nunos casos y privatizóse n' otros, con importantes pasos atrás nos drechos llaborales; y na siderurxia, más de lo mesmo: perda constante de puestos de trabayu, y cada vegada mayores presiones pa la perda de drechos llaborales. Y no tocante a seutores como la pesca, l'agricultura o la ganadería, polítiques empobinaes pola Xuniún Europea forciaron a Asturias a amenorgar enforma la so producción y, polo tanto, la so actividá, puestos de trabayu, etc.

Hai que recalcar tamién, el fechu de cómo se llevó alantre esti procesu de desmantelamientu nel qu'entró en xuegu otru factor perimportante qu'hai que tener en cuenta: los fondos de la Xuniún Europea, sobre manera los perconócíos "Fondos Mineros",

los cuales consistían nuna cuantía de perres perimportante cola que se tenía que llevar alantre esi procesu de "reconversión".

Al traviés d'estos fondos y sovenciones procedentes de la Xunión Europea entamaron a aniciase decenes de megaobres y grandes infraestructures col oxetivu de "modernizar" y ameyorar les vías de comunicación de les zones mineres ya industriales pa que, según el discursu oficial, les nueves fábricas que se diben asitiar ellí tuvieren meyores infraestructures, col envís de mover meyor la materia primo y tol material qu'ellí se diba xenerar. Nesi sen, y casi de mou paralelu entamaron a surdir nueves industries cola ayuda de munchos millones d'euros de sovenciones procedentes de les arque públiques. Exemplu d'ello son Venturo XXI, Alas Aluminium, museos pantasma, parques teunolóxicos, edificios-ñeru pa la creación d'empreses, polígonos industriales, edificios con oxetivos d'investigación mediuambientales, etc. Toos estos nomes, en parte son perconocíos porque al mesmu tiempu que pesllaben los pozos mineros y grandes fábricas como los talleres de Duro Felguera, la Naval na costa asturiana, etc, éstes nueves empreses feches gracias a les perres públiques, prometíen trabayu asgaya y una continuidá de la industria asturiano. Pero la realidá foi que dempués d'abrir y d'echar andar la fábrica, a los pocos años pesllaron dexando grandes pufos económicos y estenses naves industriales modernizaes pero vacíes d'obreros y de trabayu, al igual que les vieyes que taben acabantes de pesllar. Les poques que sigúen abiertes, mantienen a los trabayadores n' EREs o contratos precarios y otres, como munches de les infraestructures destinaes al desendolucu de la investigación mediuambiental, enxamás llegaron a abrir. Esa foi y ye la murnia realidá a la qu'amás hai qu'amestar les práutiques caciquiles y clientelares de sindicatos institucionalizaos como UXT nestes empreses, onde yera práuticamente requisitu afiliase a la central "sindical" de turnu pa caltener el puestu de trabayu.

Otru factor importante a tener en cuenta son les prexubilaciones, cuyu oxetivu nun yera otu que'l d'adormecer y "comprar" a un altu porcentaxe de la clase obrera qu'hasta esi momentu yera una de les más combatives nel Estáu español. Estes prexubilaciones lleváronse alantre col sofitu y fuerte compromisu de los sindicatos mayoritarios (CCOO ya la UXT), asina como polos partíos políticos de Gobiernu, tanto n'Asturies, como en Madrid, ente los que tomó parte mui activa la cúpula de la FSA-PSOE d'Asturies con un fuerte sofitu d'Izquierda Xunida. Estes prexubilaciones consistieron en xubilar a trabayadores de la mina a una edá entornu a los 45 años, a cambiú d'una pensión considerable. Con esta práctica, asegurábense una cierta paz social pa dir pesllando pocu a pocu más pozos, más industries y dir desaniciando el texú industrial d'esos territorios ensin que práuticamente

naide gorgutare. Asina, de forma sele, pero con pasu firme, el sistema xeneró estabilidá económicu pa munches families nes zones onde mayor llucha obrera había a cambiu de que s'aparare el ruíu de los obreros y a cambiu tamién de condergar el futuru de cási que tola mocedá de les zones industriales d'Asturies. Tres tou esti procesu, qu'entovía nun finó, atopamos una tresformación radical de les árees d'Asturies nes qu'hai 30 años había una enorme conciencia de clase y munchu sentimientu obreru. Güei, gran parte de la mocedá nestes árees alcuéntrase adormecida y milenta moces y mozos colen d'ellí ensin perspectives de tornar.

Ye ésti'l casu más sangrín, dáu'l desmantelamientu industrial, l'avieyamientu, perda poblacional, etc, que se vien dando nes zones, pero nun ye l'únicu casu, dao que podemos ver procesos asemeyaos n'otres fasteres ya instalaciones industriales onde quixo repetise un procesu similar de desmantelamientu seliquín ensin apurrir alternativa dala pa les xeneraciones que veníen darréu.

Tres esti breve análisis surden delles entruques: ¿cómo se llegó a esta situación y por qué?

Ta claro que la Xunión Europea vendióse como un proyectu que diba traer mayor bientar a los pueblos, y más nel Estáu español, que venía de 40 años de dictadura facista. Pero la realidá ye que dempués del franquismu, vieno la dictadura del Capital y del sistema neolliberal, too ello en forma de democracia representativa burguesa. Nesti sistema había y hai "un plan" específicu pa cada pueblu, frutu de la división territorial de la distribución económica siguiendo los porgüeyos y necesidaes de la clase dominante, y nel casu asturianu "el plan" ta bien claru: desmantelamientu de tou aquel texíu industrial que fora perxudicial pa los intereses de les clases dominantes hexemóniques a nivel européu, y el cambiu d'orientación de la nuesa actividá económica: pasamos de fabricar productos semitresformaos, d'esportar carbón, etc, a ser productores de lletricidá pa la so esportación, a producir mano d'obra que posteriormente abandona'l país rumbu a otros centros económicos, o la orientación d'Asturies haza un parque temáticu turísticu baxo la marca "Paraíso natural", con un perfil de puestos de trabayu empobináu a la estacionalización, la precariedá, y la mengua de drechos.

¿Qué fai falta pa aparar esta situación? ¿Qué podemos facer?

P'aparar esta situación son necesaries les idegues y la fuercia de tol pueblu trabayador asturianu, y nesti casu concretu, de tola mocedá.

Sicasí, la Mocedá d'Izquierda Soberanista entiende que n'últimu términu, pa conseguir una igua completa d'esta problemática y de toles causes que la despliquen ye inevitable plantegar un cambiu dende'l raigañu colos siguientes puntos básicos:

- 1) **Construyendo la soberanía** que permita a la clase trabayadora asturiana algamar el poder, pa poder desendolcar en consecuencia les midíes oportunes pa los nuegos intereses como pueblu: pa que la industria, la economía, les polítiques sociales, culturales, etc, les decida'l pueblu, pal pueblu. Pa ello, ye imprescindible la superación marcos estataes y supraestataes empobinaos al beneficiu de la burguesía: Namái podemos algamar la necesaria soberanía que permita al pueblu trabayador asturianu tomar les midíes qu'igüen estes problemátiques frayando col Estáu español, la Xunión Europea, la OTAN, y cualquier otra institución que mos somorguie a los intereses del imperialismu. Nesi sen, consideramos que nun ye viable, por exemplu, una reindustrialización atendiendo a les nuses necesidaes específiques, ensin frayar col marcu de la Xunión Europea y, en consecuencia, col Estáu español.
- 2) Avanzando na **conquista del socialismu**: frayar colos marcos imperialistes y construir la nuesa soberanía como pueblu, implica superar el sistema capitalista, siendo l'alternativa vidable la construcción d'un estáu al serviciu del pueblu trabayador: la República Socialista Asturiana, que se rellacione en condiciones de soberanía -ye dicir, de la forma que'l pueblu trabayador asturianu considere oportuna- col restu de pueblos del mundu.
- 3) **Frayando col sistema patriarcal**: ensin igualdá de xéneru ye imposible iguar estes problemátiques, polo que la llucha antipatriarcal, que permita la fin de les opresiones y dominaciones específiques carecís poles muyeres, ye un finxu irrenunciable.
- 4) **Esplotando los recursos naturales de xeitu más caltenible, y atendiendo a los nuegos intereses como pueblu**: qu'un país sobreproductor de lletricidá tenga problemes colos precios de les tarifas llétriques industriales, a miles de persones ensin poder pagar el recibu... en definitiva, a un pueblu que nun ve los beneficios de la

esplotación d'esti aspeutu, nun ye almisible de nenguna forma. Debemos poner los nuegos recursos al serviciu de los nuegos intereses como clas trabajadora, compatibilizándolo col caltenimientu natural.

- 5) Tornando a poner la güeyada en **seutores económicos y formes d'organización social propies del nuesu pueblu**, combinándolo con formes más nueves: l'agricultura, la ganadería, o la pesca, son seutores a recuperar y potenciar, dende una perspeutiva de creación de futuru lo más caltenible posible no ecolóxico, y de la imprescindible soberanía alimentaria. Y en cuantes a les formes d'organización social, ferramientes participatives como la parroquia o collación, el conceyu abiertu, l'andecha o la sestaferia, son preseos a tener en cuenta pa recuperar, actualizar, y repensar como pegoyos d'una verdadera democracia popular.

Lo anteriormente plantegao son aspeutos que podríamos considerar maximalistes, que requieren d'un camín y unos plazos más llargos, pero **¿qué midíes podríen esixise nel contestu actual como pasos mínimos esixibles p'ameyorar la situación?** Deben ser éstes midíes que permitan avanzar na dignidá y la democracia coles qu'evidentemente nun vamos conformanos, pero que nos paez claramente esixible a cualquier propuesta política que se diga asturiana y puxe pola democracia popular, y compaxinables cola llucha que de verdá nos va traer la tresformación: dende la cai, la organización, y la movilización.

- 1) **Planes d'empléu xuvenil** dende'l gobiernu asturianu y los conceyos: creación de puestos de trabayu públicos específicos pa la mocedá, que nun supongan otru nichu más de precariedá, sinon qu'apurran estabilidá y unes condiciones dignes.
- 2) **Nacionalización inmediata de los seutores productivos del país**, siendo clave n'Asturies dalgunos como l'enerxéticu, el mineru, el naval o'l siderúrxicu. Valió d'esplotar los nuegos recursos pa intereses empresariales privaos. Valió de dismantelar los principales seutores económicos de comarques enteres. Valió d'amenazar con deslocalizaciones que dexaríen miles de persones nel paru.
- 3) **Cero sovenciones públiques pal emplegu empobinaes a organismos privaos**: nin a ETTs, nin a empreses privaes, nin a nengún otru mercader d'esi calter. Emplegu direutu d'esi presupuestu na creación pública de trabayu.

- 4) **Fomentu dende'l seutor públicu del modelu cooperativista** y otres vías alternatives, pa la reactivación de seutores como l'agrícola o'l ganaderu: ye un sistema que permite un modelu aceutable de democracia nel puestu de trabayu, asina como la puesta en marcha de proyeutos a pequeña escala; yá lu ta poniendo en práutica l'Asamblea de Paraes y Precaries d'Asturies.
- 5) **Vertebración del tresporte públicu**, asumiendo les competencies en cuestiones como'l ferrocarril, potenciándolu y adaptándolu a les necesidaes populares. Ye inalmsible que la política de tresporte públicu tea subordinada a los intereses de poderoses families y empreses como los Cosmen y ALSA.
- 6) **Política cultural que potencie les espresiones propies del país** -tradicionales y actuales- y cree alredu d'ello un texú productivu potente: puxu de les espresiones culturales propies, RTPA n'asturianu, sofitu a la industria del doblaxe audiovisual, circuitu musical, teatral, etc estable y profesional, oficialidá y polítiques de normalización pal asturianu,etc.
- 7) **Desendolcu de polítiques de recuperación mediuambiental** n'aspeutos como'l caltenimientu y defensa de la fauna o la flora autóctono, potenciación de formes de producción d'enerxía caltenible que puedan dir sustituyendo parcialmente a otres bien perxuiciosos como la térmica. Emplegu de métodos más llimpios nesti tipu d'enerxíes puerques.
- 8) **Desendolcu plenu del nuesu estatus autonómicu**, qu'ente otres cuestiones afite un **gobiernu asturianu non sucursalista** dafechu que confronte col Estáu español amosando les llimitaciones del réxime d'anguaño. Soberanía fiscal que permita la xestión de los nuegos propios recursos económicos y, poro, el desendolcu de polítiques empobinaes a algamar toos estos puntos.

Estes cuestiones que consideramos de mínimos deben combinase, como nun podría ser d'otra forma, cola concienciación, la organización, y l'aición popular dende la base, p'algamar finxos innegociables: la soberanía, el socialismu, y el feminismu pal nuesu pueblu.

- 1) Imprescindible la **movilización en defensa de cada puestu de trabayu**, en defensa de cada derechu, en solidaridá con cada persona reprimía.
- 2) Trabayu de **concienciación ensin medies tintes**: señalando'l raigañu de les explotaciones, opresiones y dominaciones que carecemos y orixinen la problemática de la emigración. Formación académico, política y profesional continua de la mocedá militante.
- 3) Avance haza'l **trabayu conxuntu de tolos actores que compartamos unes reivindicaciones de mínimos contra la emigración forciada n'Asturies**: hai que tornar a facer práctica la consigna del UHP, y cuestiones como ésta suponen una oportunidá d'avanzar nesi sen.
- 4) Afondar na **construcción d'un movimientu d'izquierda soberanista que suponga una ferramienta útil pal pueblu trabayador asturianu en cualquier frente**: Enanchemos los frentes de llucha esistentes, avancemos na construcción d'un referente sociopolíticu, amplíemos el trabayu de creación d'un proyeutu programáticu específicu pal nuesu pueblu y tresformador, onde la denuncia de la emigración forciada, por englobar cási que toles problemátiques principales del nuesu país, seya un elementu discursivu referencial.

Entendemos que toes estes cuestiones concretes permitiríen dos vertientes:

- En primer llugar, plantegar una llucha por unos puntos mínimos concretes que, de materializase, supondría un avance nunes condiciones dignes pa la mocedá, y qu'en tou casu debe potenciar la fuerzia y unidá de les propies lluches desendolcaes por ella.
- En segundu llugar, crear contradicciones y afondar nes esistentes, facilitando señalar que l'únicu camín pa una **SOLUCIÓN COMPLETA** de les problemátiques de la mocedá asturiano, de la falta de futuru dighu nel nuesu país, pasa inevitablemente por algamar la soberanía, el socialismu, y el feminismu, o lo que ye lo mesmo, por un ruptura total colos pegoyos del actual sistema.